

# Ina u in secretari per l'entira Rumantschia

Las abilitads dad in futur secretari da la Lia èn pli impurtantas che la schlattaina u la derivanza

DAD ANDREAS CADONAU

■ **La derivanza regionala u la schlattaina na giogan betg ina rolla principala tar la tschertga da la successiun dal nov secretari general da la Lia Rumantscha. Per pli impurtantas vignan valitadas las abilitads personalas da la secretaria u dal secretari nov da resguardar ed unir las divergenzas entaifer la Rumantschia. Giavischè vegn in profil dal nov sumegliant a quel dal secretari partent Urs Cadruvi.** «Ina secretaria u in secretari per tut la Rumantschia, ina u in cun in cor che batta en il tact rumantsch.» Il giavisch vers la nova secretaria u il nov secretari da la Lia Rumantscha vegn da la presidenta da la Uniun rumantscha Grischun central, *Zegna Pittet*. L'entira Rumantschia vesa Pittet tant da chasa a Berna sco a Savognin u en ina autra regiun. Ed ella spetga dal nov secretari certas abilitads economicas per vinavant tegnair en mastrinas las finanzas da la Lia sco in sensori da tadar sin vuschs rumantschas pli quietas e na sulet sin vuschs che fan la pli gronda canera. La presidenta da da la Uniun rumantscha Grischun central valitescha las abilitads dal nov secretari per pli impurtantas che la derivanza u la schlattaina da la candidata u dal candidat. «Sch'i dat ina candidata ed in candidat cun las abilitads egualas spetga Pittet che la suprastanza da la Lia Rumantscha elegia la candidata sco successura dad *Urs Cadruvi*. Ma la presidenta da la Uniun rumantscha Grischun central è conscienta che candidatas e candidats per la successiun da Cadruvi na crodan betg simplamain da tschiel. Indicaziuns pli concretas per persunas predestinadas sco nov secretari general da la Lia na po Pittet per il mument anc betg numnar. Al secretari general Urs Cadruvi attribuescha ella dad avair fatg

buna lavur e dad avair gè il sensori necessari per l'entira Rumantschia. D'avair prestà buna lavur atesta medemamain il president da la Pro idioms Surselva, *Lorenz Alig*, al secretari general partent. El ha explitgà che Cadruvi saja sespruvà da tegnair l'equiliber entaifer la Rumantschia. Alig resguarda che quai na saja betg adina simpel ed il secretari stoppia tedlar critica da tuttas varts. La derivanza da la nova secretaria u dal nov secretari n'è per il president da la Pro idioms Surselva betg prioritara, plitost las abilitads integrativas ed ord vista da la Pro idioms da resguardar las decisiuns dal su-



**Las abilitads e cumpetenzas dad ina nova secretaria u in nov secretari general da la Lia Rumantscha vegnan valetadas per pli impurtantas che la derivanza u la schlattaina.**

FOTO P. DE JONG

veran pertutgant la lingua d'instrucziun en scola.

## In bun mediatu cun enconuschientschas economicas

Il president da l'Uniun da Rumantschas e Rumantschs da la Bassa e commember da la suprastanza da la Lia, *Jon Carl Tall*, giavischa ina tscherta cuntinuaziun da la lavur da la successiun dal secretari partent. Er el valitescha las abilitads da la candidata u dal candidat per pli impurtantas che la derivanza. La funcziun da mediatu ed abilitads economicas èn per il president da l'Uniun dals Rumantschs da la

Bassa d'impurtanza centrala per ina nova secretaria u in nov secretari general era envers ils basegns dals Rumantschs che vivan en la Bassa. «Igl è simplamain in fatg che 30 000 Rumantschas e Rumantschs vivan en la Bassa.» Per far ponderaziuns davart persunas ablas da surpigliar l'incumbensa dal secretari general da la Lia esi tenor Tall anc memia baud. E quai èsi era per il president da la Surselva Romantscha, *Vitus Gartmann*. Er el è conscient ch'i na saja forsa betg simpel da chattar ina persuna pronta da surpigliar il post dal secretari general. Bain conceda Gartmann ch'i saja impurtant che las re-

giuns sajan represchentadas en ils gremis da la Lia. Preferenza gioga era per il president da la Surselva Romantscha las abilitads da candidatas u candidats, abilitads integrativas. El deplorescha fatg che Cadruvi na cuntinueschia betg cun sia lavur. Ina fatg buna lavur da tschetgar in equiliber tranter ils differents basegns da la Rumantschia era grazia a las abilitads linguisticas da Cadruvi da s'exprimer en tut ils idioms. Ch'il temp saja madir per ina secretaria generala crai il president da la Giuventetgna Rumantscha *Uolf Candrian*. Sch'ina dunna saja dentant pronta da surpigliar in tal post che saja suttemess in pau a giesus da pussanza dubita el in pau. El spera dentant da vinavant chattar in partenari en Chasa Rumantscha a Cuir interessà als basegns e giavischs da la giuventetgna rumantscha.

## Dar temp ad ina u in nov secretari

Diplomatic, comunicativ, pronts da tedlar e stgaffir punts, quai en ils terms che la presidenta da la Uniun dals Grischs, *Annalea Stuppan*, ha stipulà en connex cun ina nova secretaria u in nov secretari. Er ella na tschenta betg la prioritad sin la schlattaina u sin la derivanza dal nov secretari. Ella spera dentant che la persuna che vegnia la finala elegida da la suprastanza da la Lia retschaivia il temp necessari per chattar sia moda da lavurar e da s'exprimer. *Flurin Bundi*, copresident da la Svizra Rumantscha, giavischa, sche pussaivel, ina secretaria, ina curaschusa. Curaschusa da definir ina clera strategia per la Rumantschia e curaschi per exequir quella strategia e quai senza far slalom e cun il curaschi da na insister adina sin la pasch interruman-tscha. Curascha givischa Bundi era da la nova secretaria u secretari da far valair ils dretgs vers la politica chantunala e federala.